

25 AUG 1997

DR MAHATHIR TERIMA ANUGERAH TERTINGGI BRUNEI (Bergambar)

KUALA LUMPUR, 25 Ogos (Bernama) -- Perdana Menteri Datuk Seri Dr Mahathir Mohamad hari ini menerima Bintang Kebesaran Negara Brunei Darussalam, Darjah Kerabat Laila Utama Yang Amat Dihormati Darjah Pertama (DK), dari Sultan Haji Hassanah Bolkiah Mu'izzaddin Waddaulah.

Sultan Brunei, yang tiba di sini hari ini untuk lawatan rasmi empat hari, menyampaikan anugerah tertinggi negara itu kepada Dr Mahathir pada istiadat menghadap di sebuah hotel terkemuka di sini.

Pengurniaan bintang kebesaran itu adalah sebagai tanda penghormatan dan penghargaan Brunei atas usaha-usaha Perdana Menteri meningkatkan dan mengukuh-eratkan hubungan dan kerjasama antara Brunei dan Malaysia ke tahap cemerlang yang wujud sekarang.

Dr Mahathir merupakan tokoh bukan raja atau kerabat raja dari luar Brunei yang pertama menerima anugerah itu.

Bintang kebesaran itu pernah dianugerahkan kepada raja dan kerabat-kerabat raja beberapa buah negeri di Malaysia selain kerabat-kerabat raja di Brunei sendiri.

Kedua-dua isteri Sultan Brunei, Paduka Seri Baginda Raja Isteri Pengiran Anak Hajjah Saleha dan Pengiran Isteri Hajjah Mariam turut berangkat pada majlis itu.

Isteri Perdana Menteri, Datin Seri Dr Siti Hasmah Mohd Ali juga hadir.  
-- BERNAMA.

AH WAT